



Baywatch Bebbi Basel
Keeping the beach clean since 1930
Winter 2015/2016

Lassen Sie
Sorgen Sorgen
sein!

Entspannen an den schönsten & saubersten Stränden Europas

D Nächst wärde lenger und d Dääg blybe grau
am Ranze zwiggt d Narbe, bisch fuul wie-ne Sau
Griegsch kei Luft me durch d Naase, s schloot dr alles uff s Gmiet
Dini Abweer spiilt vollkomme desorientiert
Numme-n usswäggsle kasch nit, drum ziehsch es halt duure
Scho kurz nooch em Uffstoo bisch voll uff dr Schnuure
Gohsch am Ahti ins Näscht und hoffsch s wurd bald besser
Isch s morn duss ächt kelter oder wird s numme nesser?
Das wär dr Momänt, wo s sogar esoo Pinsle
wie Dir langsam klar wird: Bisch ryff für uff d Insle!





**Sorglospaket
inklusive!**

**Ihre Sorgen möchten
wir haben!**

Scho nach zwei Dääg am Strand, in dr Sunne am Meer
isch Di Schnubbe-n ewägg und Di Stresskonto leer
Zu däm Schritt zrugg ins Lääbe biete mir Dir gärn Hand
Kumm mit an Baywatch Bebbi Strand!
Dört vergissisch dr Alldaag, mir haue Di um!
Mir baade Di in Baccardi-Rum!
Mir danze mit Dir, mir träume und chille
Mir dien in Fässer Säuli grille
Unseri Strandbar versorgt Di mit Gin und mit Bier
S gitt nit eini oder zwei oder drey, sondern vier
Das alles isch Deil vo Dim Sorgloos-Päggli
e vollsinndeetigg Trainer-Jäggli
e Dringghelm, e Schoorts und zwei Aadilette
e Sunnebrülle zum d Pamelas tschegge
wo dief entspannt in dr Sunne ligge
Nei, mir sinn kei Männerclique!



**Bombastische
Preise**

**Hier explodiert nur
Ihre Stimmung!**

Mir sinn d Baywatch Bebbi Basel!
Mir loose-n uff kei Gender-Gfasel
und mache Dir Di Strand baraat!
Ass joo nyt stöört, will das wär schaad
D Mission isch Dini Zfriideheit
Versprichs! Du gisch uns sofort Bscheid
wenn Di öppis plooge sott
Du hesch Di Rueh verdient bi Gott!
Dooti Wääl dien mr ganz schnäll seziere
Am Baywatch Strand ka nyt explodiere
Au Abfall uss Blassdigg und kabuddigi Qualle
ruume mir grad ewägg in e luftdichti Halle
Ass Dr joo nyt uff e Maage schloot
isch dr Baywatch Strand iigfasst mit Stacheldroot
Du kasch uns vertraue, mir leischte en Eid:
Mir rette Di mit Sicherheit!

Vergiss
die Sorgen
der Anderen!

Lassen Sie sich Treiben!

Dangg uns kasch das druurige Wältgschee vergässe
Griegsch Hummer und Glöpfmoscht zum Zmoorgenässe
Für das riskiere mr unser Kaarma und s Lääbe
dien d Sandköörnli daile wo zämme gläabe
Räche-n alles ewägg was Di Stimmig könnt triebe
und blibt öppis ligge dien mr s einzeln abschiebe
Kei Bild wo Di killt und wenn doch, schieb s uff d Sytte
Gang s Surfbrätt go hoole und die Wälle go rytte
Mir passe jo uff, kunnsch scho nit ins Schwimme
Dangg unserer Steelband ghöörst au keini Stimme
wo frooge wie Du z Nacht kasch schloofe
Findsch ärschthaft ass die Kataschtroophe
Di nyt aagoot usser bim Baade
am Feeriestrand. Wotsch das wirgglig saage?
Isch s mit uns tatsächlich so wytt?
Nit numme redoorsch wär s besser seisch nyt!

D Ladäärne die isch wälle föörmig
Si hett vom Plott e bitzli Köörnig
Die gseesch am Zyschdigzoobe funggle
Am Münschterplatz ganz häll im Dunggle

Falls Di Bueb an d Fasnacht wetty, schigg en zu de Junge Bebbi
<http://www.jungibebbi.ch>
<http://www.baslerbebbi.ch>

